



Setjhaba se ratehang sa CUT

Ho le hopotsa ka molaetsa wa ka wa la 16 Hlakubele 2020: Letona la Thuto e Phahameng, Saense le Boiqapelo le ile la phatlalatsa hore *“ditsi tsohle tsa thuto e phahameng di tla kwalla matsatsi a phomolo ho tloha hosane ka la 18 Hlakubele 2020 mme di bulwe ka mora mafelo a beke ya Paseka ka la 15 Mmesa. Sena ha se bolele hore diyunivesithi di tla kwala molebe empa e le ho nka matsatsi a phomolo pele ho nako e le tsela ya ho kgina dithuto.”* Sena se tsamaisana le qeto eo re ileng ra e nka hore re qale matsatsi a phomolo Laboraro ka la 18 Hlakubele 2020.

Re le setjhaba sa CUT, re ikemiseditse ho iketsa kgokanaphiri hore re lwantshe ho nama ha *corona*. Le ka tswa le utlwile molaetsa o tswang mmusong le Institjhuteng ya Naha ya Mafu a Tshwaetsang (NICD) moo ba hlalolang hore mothathing ona re *kgatong ya taolo ya corona*. Ka hoo, kaofela ha rona re lokela ho fokotsa ho kopana le batho molemong wa ho theola ho nama ha kokwanahloko ena hore e se ke ya fetela *kgatong ya tshwaetsano ya baahi*.

Re ikamahantse le taba ena, batsamaisi mmoho le Moifo wa Diketsahalo tsa Tsohanyetso wa CUT o tobaneng le ho lwantsha *corona*, o kentseng bankakarolo bohle le dirutehi tsa yunivesithi ba dumellane ho kenya tshebetsong metjha e latelang hanghang:

- ❖ Matsatsi a phomolo a ekeditswe ho tloha ka la 18 ho ya la 29 Hlakubele 2020 ho fihlella ka Labobedi la 14 Mmesa 2020 mme yunivesithi e tla bula ka la 15 Mmesa 2020.
- ❖ Dithuto tsohle tse kenelang diphaposing le dilaborathoring ho kenyelleditswe le diteko ho tloha boemong ba lengolo la Diploma ho fihla boemong mangolo a Honours le Postgraduate Diploma di tla kginwa mothathing ona.
- ❖ Dihosetele tsohle tsa baithuti di tla kwalwa ka Moqebelo wa la 21 Hlabubele mme baithuti ba sitwang ho itlheka ka lebaka la ho hloka ditjhelete ba ikopanye le Rejisetara.
- ❖ Ho tloha ka Mantaha wa la 30 Hlakubele ho fihla ka Labobedi la 14 Mmesa, baithuti ba tla qala ho fumana dithuto tsa bona marangrang a thekenoloji. Barupedi ba tla buisana le baithuti ka e-Thuto mme baithuti ba lokela ho etela e-Thuto ka mehla ho fumana lesedi. Ena ke tsela ya rona ya ho itlolaka le hona ho nnetefatsa hore re sebedisa matsatsi a ekeditsweng a phomolo ha ntle ka ha re se na bonnete ba hore selemo sena sa dithuto se re tshwaretseng. Re eelletse hore ba bang ba baithuti ba rona ba tla sitwa ho kena marangrang. Ka hoo, Telkom e phatlaladitse hore bareki ba yona ba ke ke ba lefella ditjeho jwale baithuti ba tla kgona ho fihlella www.cut.ac.za mahala. Re ntse re buisana le dikhampane tse ding tsa datha ho re di re tshehetse.
- ❖ Mananeo a boitjhoriso ba baithuti (WIL) a ka kginwa ke bahiri kapa ke baithuti ha feela ba buisane le difakhalithi tse amehang.

- ❖ Baithuti ba etsang dithuto tsa *Masters'* le tsa Bongaka ba ka tswelapele ka diphuputso tsa bona empa ba hlokomele hore ba sebetsa ba le bahlano (5) feela sehlopheng kapa ka laborathoring. Batataise ba baithuti bana ba lokela ho nnetefatsa hore ho latelwa metjha e nepahetseng ho sireletsa baithuti bana.
- ❖ Ditlhophiso tsena di tla ama tshebetso ya yunivesithi. Ho re re kgone ho fokotsa dikotsi tsa tshwaetsano, basebetsi kaofela ba tla sebetsa nako ya dihora tse lekanyeditsweng (flexi) kapa ba sebeletse malapeng moo ho kgonahalang ho tloha la 19 ho ya ho la 20 Hlakubele 2020 le mohla 30 Hlakubele 2020 ho fihla ka la 14 Mmesa 2020. Sena se tla fa basebetsi monyetla wa ho tswelapele ho tshehetsa baithuti ho fumana dithuto tsa bona marangrang ba bile ba ntse fokotsa ho kopana le batho ba bang. Baokamedi ba mafapha a fapafapaneng ba tla laola ditlhophiso tsena.
- ❖ Ho ama hape taba ya mohla la 23 ho ya ho la 27 Hlakubele 2020, e leng ntlha e fapaneng le eo ke e buileng molaetseng wa la 16 Hlakubele 2020, Lefapha la Basebetsi (HR) le tla fa basebetsi kaofela matsatsi a lifi e ikgethileng. Matsatsing ana (23 ho ya ho 27 Hlakubele 2020), meaho yohle ya dikhempase e tla hlwekiswa ho boele ho bolawe le dikokwanahloko. Re kopa hore basebetsi bohle ba nnetefatse hore ba ntsha thepa ya bona le ditokomane tsa bohlokwa dibakeng tsa tshebetso le diofising. Basebetsi ba ditshebeletso tse hlokolosi jwalo ka balebedi, ba tla nne ba theohele bekeng ya la 23 ho ya ho la 27 Hlakubele 2020.
- ❖ Mothathing ona, re tla tjetjhisa ditlahlobo tsohle tsa kgwedi ya Phupjane mme ho na le kgonahalo ya hore sena se tla ama matsatsi a phomolo a kgwedi ya Phupu. Re se re tla le tsebisa matsatsi a nepahetseng nako e tlang.

Ke kopa le eellwe hore dintlha tse ke di boletseng ka hodimo di laolwa ke maemo a amanang le *corona*. Yunivesithi e ntse e tsitlallela ho matlafatsa le ho beha sehlohlolong Leano la Ntshetsopele ya Kgwebo ho nnetefatsa hore re na le maano a lekaneng ho lwantsha kotsi ena le tse ding tse tobileng setjhaba sa rona sa CUT le naha ka bophara. Re tla nne re tswelopele ho kopana le bankakarolo nakong ena ho hlahloba boemo bona. Re tla le tsebisa ka ditlhophiso tse tla re amang ho tloha ka la 15 Mmesa 2020 ka ha re sa ntse re lekola maemo.

Ke batla ho hatella metjha e latelang eo ke e boletseng molaetseng wa ka wa la 16 Hlakubele 2020:

- ❖ Ho thibela basebetsi le baithuti ho etela dinaha tsa matjhaba le ho thibela baeti ba tswang dinaheng tsa matjhaba ho tloha ka la 16 Hlakubele 2020 ho fihla ka Phujane 2020.
- ❖ Ho latela boipiletso ba Moporesidente, ho tloha ka la 16 Hlakubele 2020 ho fihla ka Phujane 2020, re tla kgina diboka le diwekeshopo tsohle tsa yunivesithi moo re neng re memme baeti ba tswang dinaheng tsa matjhaba.
- ❖ Re tla tjetjhisa mekete ya dikapeso e neng e reretswe ho tloha ka la 17 ho ya ka la 20 Hlakubele 2020 ha re sa ntse re shebisana ka nako e ntjha. Rejistara o tla tsebisa baithuti hore ba tla fumana jwang mangolo a bona a thuto.
- ❖ Ho matlafatsa metjha ya rona e matla ya bohlweki dibakeng tsohle tsa khempase ya rona jwalo ka dihoseteleng tsa baithuti, diphaposing tsa thupello, dilaborathoring, diofising le matlwaneng.
- ❖ Ho isa baithuti le basebetsi ba ileng ba etela dinaha tse anngweng haholo ke kokwanahloko ya *corona* ho tloha ka la 14 Hlakubele 2020 kwaranthining (sebakeng sa polokeho) pakanakong ya matsatsi a 14, ebang ba bontsha a mang a matshwao a kokwanahloko ena, ba tla tlameha ho etsa ditoko. Lefapha la Dikamano tsa Matjhaba le Tshebedisanommoho (DIRCO), le hlwaile Italy, Iran, South Korea, Spain, Germany, United States of America (USA), United Kingdom

(UK), Switzerland le China e le dinaha tse wetsweng ke koduwa ena haholo ka la 17 Hlakubele 2020. Qeto ena e tla kenywa tshebetsong ke baokamedi (bahiriwa ba16.2) ba hirilweng ho latela Molao wa Polokeho ya Basebetsi.

- ❖ Re se re qadile ho buisana le baithuti ba CUT ba ntseng ba ntshetsapele dithuto tsa bona diyuniveisithing tsa setswalle tse mose mme re tla kenya tshebetsong metjha e meng moo ho hlokehang.
- ❖ Re tla matlafatsa letsholo la rona la ho lwantsha ho ata ha kokwanahloko ena ho nnetefatsa hore setjhaba sa rona sa CUT se itekanetse.

Ditlilini tsa dikhempase tsa rona ka bobedi di malalaalaotswe ho kenya tshebetsong metjha e behilweng ke Lefapha la Naha la Bophelo mmoho le Lefapha la Porovense la Bophelo. Baithuti le basebetsi ba anngweng le ba tshwaeditsweng ke kokwanahloko ya *corona* ba lokela ho fumana thuso ka ponyo ya leihlo.

Latela metjha ena ha o belaela hore o tshwaeditswe ke *corona*:

- ❖ Letsetsa 080002999 mme o ba tlalehele
- ❖ Letsetsa ngaka ya hao, tlilini kapa sepetlele.
- ❖ Letsetsa ER24 ebang o sa kgone ho fumana dibaka tse boletsweng ka hodimo.
- ❖ Dipetlele tse fumanehang Bloemfontein ke MediClinic, Rosepark, Universitas, Pelonomi, Busamed kapa ditlilini tsa lehae.
- ❖ Dipetlele tse fumanehang Welkom ke: MediClinic, Bongani Hospital kapa ditlilini tsa lehae.
- ❖ Letsetsa mookamedi wa hao CUT mme o se ke wa tla ka seqo.
- ❖ Etela: <https://www.cut.ac.za/coronavirus> ho fumana lesedi le batsi.

Hobane bophelo le boitekanelo ba basebetsi le baithuti ba rona bo bohlokwa haholo, re dumela hore metjha e kang ho fokotsa ho kopana le batho, e tla re thusa ho laola ho nama ha kokwanahloko ena.

Ntilha e nngwe ya bohlokwa ke hore o itlhokomele. Ke a tshepa hore le tla ikobela metjha ena le hore rona moifo wa CUT mmoho le baahi ba Aforika Borwa le baithuti ba matjhaba re tla hlola pharela ena.

E se e ka Ramasedi a ka le hlohonolofatsa!

Prof. Henk de Jager

Vice-Chancellor and Principal